

E PROBLEMA DI TERMINACION DI CALYPSO/ROADMARCH

Aruba a confronta un biaha un problema tradicional di carnaval di ultimo tanto añanan, cu ta problema durante concurso di calypso/roadmarch.

Ayer a dia tabata repleto di critica, malcontento, kehonan etc. debi na e paramento di e concurso ayera madrugada 12.30 or mas o menos.

Y un biaha mas POLIS a haya tur falta un biaha mas, y inhumamente. Inhumamente, pasobra polis a carga culpa pa algo cu no ta nan culpa. Por corda for di dia 8 di januari cu polis a tene conferencia di prensa, cu a wordo menciona cu lo mester termina eventonan di den siman pa 12 or anochi. A wordo hasta menciona e ehemplo di reinasitanan durante eleccion di reina infantilnan cu laat anochi mester wordo lanta for di soño pa nan presenta.

Pero esey, ta fuera di e topico. Lagami keda na e topico.

A wordo anuncia e dia ey cu 3 dia despues lo reuni cu ASOMA riba e evento di calypso/roadmarch.

E reunion ey a tuma lugar y a combinari riba e TRES anochinan di concurso y TUR hende tabata contento cu pa 12 or e lo termina, cuminsando 7 or anochi.

Di informacion cu mi a ricibi, polis a muestra tur sorto di flexibilidad y duna tur colaboracion pa e aña aki no tin ni un problema pa tilda POLIS ATROBE.

E publicacion di e programa di DOS anochi, a bin sorprende polisnan cu no tabata na altura di esaki y nan a tuma contacto cu ASOMA riba esaki, mustrandocu ta imposibel pa tene e dos anochinan y termina manera combinari, pero a wordo asegura cu tur cos lo marcha bon.

TUR COS NO A MARCHA BON

Siet'or cu Maestro di Ceremonia ta cla pa cuminsar show, no por a haci esaki, pasobra atardi el a wordo informa pa un miembro di directiva cu ta 7.30 or ta cuminsar. E duda a keda den e orario pasobra na radio tambe no por a bisa si ta 7 or, 7.30 or of 8 or, y cu mester tene cuenta cu ORA DI ARUBA, tambe cu lo por tin "SPELING" etc.

Ningun hende por bisa Maestro di Ceremonia ki ora ta cuminsar. Coordinador di Stage, Miki Gravenhorst tambe tabata tur cla pa cuminsar 7 or pero tampoco no por a dicidi si no tin algo oficial pa su encargo.

ZODIAC cu tabata e prome banda pa actua, a percura pa HISTORIA, y tabata prepara SEIS OR pa nan presentacion di SIET'OR, algo cu tur agrupacion musical mester tuma como ehemplo y disciplina.

Ora cu Agente policial Vlaun a splica representante di un emisora di e areglo di polis y ASOMA di cu lo cuminsar 7 or, Maestro di Ceremonia cu tabata mi persona, a papia cu Vlaun, kende a splica bon cla henter e procedura segun palabracion di bon colaboracion entre organizadorman y polis.

Mes ora Maestro di Ceremonia a subi escenario y a habri e anochi 7.20 or. (E 20 minuut laat aki lo no a yuda tampoco si a cuminsar 7 or, pa a caba 12 or)

Pero na e momento ey e banda no por a cuminsar toca, pasobra e momento ey a bay prepara mesa y stoel pa huradonan dilanti escenario, y mester a spera riba esey.

Den e periodo aki tabata tin tambe un problema tecnico cu a afecta e banda y pone cu e banda no por a cuminsar y varios emisora tambe a ser afecta pa e fayo electrico.

BINTI PA OCHO, Zodiac a cuminsar cu su prome tononan y e show por a sigui su curso.

Mientras cu ora di termina tabata yegando, na varios ocasion, Maestro di Ceremonia Scorpio a haci yamada pa president di ASOMA, pero a resulta despues cu e no tabata presente.

Coordinadora di escenario Miki Gravenhorst tabata pega cu su tarea sin por a sigui normal y maestronan di ceremonia no tabata tin orden oficial tampoco di organizadorman pa sigui of no sigui.

Despues di deliberacion, a dicidi pa cumpli cu e areglo di 12 or anochi. Esaki ta cu ta para e anochi 12 or anochi, y si na e momento ey tin un banda tocando ta lague caba su repertorio te maximo 12.30 or.

Como cu entre 12 y 12.30 Quasi tabata riba escenario y a termina nan participacion, mi a anuncia cu e anochi ta "afgelopen" aki, pa evita cu polis lo mester bin para e anochi manera nan orden tabata si no cumpli.

ACUERDO Y ORGANIZACION DI ACTIVIDAD

Polis a carga culpa un biaha mas, pero hende mester sa cu e aña aki mas cu nunca, Polis a habri man pa duna tur colaboracion y tin biaha a ofrece mas ainda, pa tur evento di carnaval por desaroya tranquil, sin ningun polemica.

Si mantene bon organizacion y coordinacion den actividadnan y mantene na stipulacionnan, acuerdonan y palabracionnan, no mag di tin ningun problema cu ningun actividad.

Den e caso aki, e organizadorman no a pone e publico na altura di e palabracion cu polis cu ta termina 12 or y cu por pasa te 12.30 or.

E bandanan no a ser poni na altura cu si yega e ora stipula nan lo tin cu actua e anochi siguiente of e aña siguiente of ki dia.

Esaki tambe a trece malcontento cerca e bandanan cu no a actua, y na dado momento mi no por a kere mi wowo ni orea, ora cu un musico cu mi ta aprecia masha hopi, a perde respet pa un miembro femenino di directiva di ASOMA y cu palabranan masha pisa a cay. Ni e dama no por a kere di lo por tende esaki net di e musico ey, locual a duel e masha hopi tambe.

Miki cu a haci un trabao formidable mester a tende varios insinuacion pa cual e no tabata tin ningun culpa.

Maestro di Ceremonia, mi persona, mester a scucha yen di insulto pasobra "nan kier nan placa back, y insinuacionnan y reprochenan cu maestronan di ceremonia no tin nada di haber cu nan." Pero pa mi persona ta cos di: "e gobernan no por yuda, laga nan deshoga nan decepcion". Musiconan cu a reclama con a pidi liber di trabao, y cu mester pidi liber atrobe, cu a sacrifica pa por ta presente etc. y gastonan cu a ser haci.

Pero ta esaki ta pasa ora tin falta den organizacion, den coordinacion, den planificacion di actividad y ora tin falta di comunicacion ademas. Cosnan cu aña aden aña afo pa 22 aña cu POPO cu mi ta bati ariba y ta wordo tilda di ta critica, critica y critica so, pasobra ningun hende kier mira of wordo confronta cu e verdad.

E DOS NA LUGAR DI TRES ANOCHI

E concurso tabata planea pa tres anochi, locual tabata e combeniente tambe cu polis manera a splica te cu a bin e cambio pa dos anochi.

Si a haci calculacion di tempo di preparacion di banda cu promedio di 7 minuut (e 4 minuut ta poco considerando cu varios ta usa sequencer), conta 3 pa 4 minuut pa warmup (aunke ta bisa cu esaki mester ta 2 minuut), conta 30 seconde pa cada anuncio, (cu maximo 1 minuut ora tin algo otro di bisa na lugar di anuncia cantante), si conta duracion di cada calypso cu lo ser canta y cada roadmarch cu ta ser canta, si tira riba e total aki un 30 minuut pa si encaso tin un problema tecnico of problema imprevisto, lo yega na un promedio di ora di duracion di e anochi ey.

Si a haci esaki, lo tabata conoci di momento di tira lot, cu NO TA YEGA 12 or anochi e prome anochi, ni e di dos anochi, y cu lo mester a bay e TRES anochinan.

A confia mucho riba cooperacion di bandanan, cooperacion di musiconan, cooperacion di polis (cu lo a duna un chance TOCH), y tur cos a bin resulta lo contrario.

Con cu nos mira e asunto aki, e falta e biaha aki tabata cerca e organizadorman cu a confia DI MAS.

Juby

AFÉONS KROEGJE
Tonight
Blues Night
With Live Blues Music by: Free & Easy Band
& Pasto on Guitar Starts 23:00uur

TELEFONNAN
DI DIARIO
826747
FAX
828551

Quality Marking Systems
For all your
Rubber Stamps

We deliver - We have the best prices
Catiri # 23 Tel/fax: 870401